

Podsjećanje na prve brojeve i godine izlaženja časopisa Udruženja Ilmijje, za nas imame i vjeroučitelje nema samo simbolično, sentimentalno i svečano značenje. Ovaj jubilej istovremeno predstavlja i nepobitno svjedočanstvo i potvrdu višestoljetnog organiziranog i institucionalnog djelovanja Islamske zajednice i njenih odgojno-prosvjetnih ustanova. Iako je časopis *Muallim* izlazio u različitim, nerijetko prijelomnim historijskim, političkim i društvenim razdobljima, tematski i sadržajno *Muallim* je kroz sve svoje faze i mijene zadržao jedinstvenu i prepoznatljivu koncepciju i identit. To je bio i ostao časopis za odgoj i obrazovanje, medij zapaženog intelektualnog usmjerenja koji se naučno utemeljeno i kritički otvoreno bavio vjerskim i kulturnim temama, ali i pitanjima od šireg društvenog interesa.

*Muallim* su autorskim tekstovima i uređivačkom vizijom upečatljivo obilježili istaknuti bosanski alimi 20. stoljeća. Zato se *Muallim* može čitati i kao vrijedan dokument o tome kako se i u kojim pravcima razvijalo i teklo muslimansko mišljenje u Bosni i Hercegovini u svome autentičnom i reprezentativnom obliku. Stranice *Muallima* su svojevrsna hronika imamsko-muallimske misije u Bosni i Hercegovini koja se suočavala sa različitim političkim, kulturnim i socijalnim utjecajima s jedne, i sa mnoštvom neriješenih statusnih, finansijskih, organizacijskih pitanja, s druge strane.

U nastojanjima da se svojim sadržajem *Muallim* približi imamima i muallimima časopis je, zapravo, našoj javnosti i čitateljstvu približio one najplodnije misaone i idejne izdanke ponikle u jezgru muslimanskog kulturnog i civilizacijskog kruga. *Muallim* nikada nije imao pretenzije da svoj analitičko-stručni diskurs zamijeni populističkim pristupom i metodom. To ne znači da se *Novi Muallim*, naročito posljednju deceniju svoga izlaženja, ne nastoji baviti aktuelnim, konkretnim i ovdašnjim pitanjima koja su u žiži ili na margini našeg interesovanja. Nekada sa manje, a nekada sa više uspjeha sadašnjoj redakciji *Muallima* je polazilo za rukom da zainteresira našu akademsku javnost u Islamskoj zajednici da iznese svoje mišljenje i stav o različitim pitanjima. Konformizam intelektualaca i sklonost ka apstraktnom, kompilacijskom i deskriptivnom opisivanju postojećeg i već objašnjenog bile su naše najveće prepreke da *Muallim* učinimo kvalitetnijim i zanimljivijim časopisom.

*Novi Muallim* će nastaviti svoju tradiciju otvorenosti prema znanju, istraživanju i mišljenju. Zbog toga redakcija i saradnici časopisa *Novi Muallim* očekuju da Vaša podrška u profiliranju jednog renomiranog i referentnog časopisa kojeg između ostaloga defnira i stoljetna tradicija, sigurno neće izostati. U tom smislu želim Vam se zahvaliti na dosadašnjem doprinosu i angažmanu i ponoviti poziv da nastavite i pojačate komunikaciju i saradnju sa časopisom za koji nas veže snažna duhovno-povijesna i kulturno-civilizacijska veza.